

四庫全書

集部

欽定四庫全書

文苑英華卷五百十三

宋 李昉等 編

射御門三十一道

澤宮置福判六道

張侯下網判五道

不以騶虞為節判一道

不以采蘋為節判二道

鄉射司正倚旌判一道

賓觀武藝判一道

矜射判二道

祭侯判五道

馬驚師徒判七道

射不穿孔判一道

澤宮置福判

甲司澤宮將祭而習禮所由置福不設中御史劾之訴云自邦國已下則有名制王者之式未之前聞

對

鄧承緒

六藝之脩五善之備禮稱觀德義在興賢豈加爵而益封實選士而預祭惟甲何者司射澤宮見狸步之張侯以鹿鳴而應樂設中置福用陳矢筭之儀釋獲建旌遂明多少之數賓主存乎百拜公卿繼乎六耦能其中質

定以和容豈罰觥之為慙亦削地而成耻禮之美者德
實在茲况名位不同自邦君而節制器物有等寔王者
之殊儀卑不踰尊上得兼下法官所効敢奉守官之誠
訴者有辭恭聞克謹之義

同前

潘文環

祭以訓恭射唯觀德出正中質將定於賢愚備物致用
是昭其典禮瞻言爾甲司此澤宮張熊侯以示威酌狸
步而尊美飲筭初列爰立豐以表儀射器斯存亦置福

而供命然以高卑異等名位殊倫若事屬諸侯固宜同於相圃而舉非王者爰可論於設中既無共職之懋寧懼守官之効

同前

程休

刑措化成教尊義立將崇大射爰隸舊章先習禮於澤官且觀德於方國恭惟彼申天子有司展四體而能勤事一人而匪懈固合在儀必備豈可立事無規今則乾道昭回天光臨下捨矢如破雖則射不主皮置福無中

如何發彼有的法官之効以告闕於今供司存之辭訢
未聞於古制雖五等有數四侯既張而茲禮不存斯人
何罪

同前

蔣準

射以觀德禮先擇士是明五善之義豈從六藝之卑况
聖敬日躋王假有廟將期預祭之事是知必爭之道甲
學乎相圃司彼澤宮并夾既陳決拾斯似思備物以致
用奚曠官以速尤竟不具於鹿中乃空歌於狸首末學

茲甚不敏則多天子之儀用或兼下諸侯之禮事乃舉
中使揚暉而有言自發的而足獻遂合會稽之美每抽
厨子之房肅慎之貢仍韜夏后之服緊謂

同前

裴子建

選賢觀德存乎射義為邦之度因文物以肅陳將祭之
儀必先朝而慎習於是審茲狸步張彼熊侯揖至讓升
和容顯於相圃持弓挾矢雅頌彰乎澤宮司馬分進退
之規玉人奏蘋蘩之節百禮式序五善無替既有備於

置福復何遽於設中法官執此簡書欲行觥撻訴者確
乎執理憑於名制用捨之道抑有司存且列國諸侯擇
士而祭自守彝憲無相奪倫事乃屬於邦君罪寧歸於
彼甲緬稽古訓斯為正典得失之旨居然可知

同前

劉肱

大聖嗣文明時偃武弧矢之利可以訓戎禮容之規於
馬觀德將因捨奠是用求賢甲為主司素非違

一作吏

澤宮之制何昧周官相圃之儀旋非魯典既而工歌九

夏庭列三侯決捨既似於瑯弓并夾則陳於揚矢標名
一作鹿兕或有國之前聞皮稱熊豹蓋王者之恒制語
而有訴雖以執禮為詞闕而不供終當毀積之責請依
中典以勸無哀

張侯下綱判

景張侯下綱不及地武賓遂貫之監者謂無揖讓之禮
不坐奠豐上賓袒決而退

對

劉 瑾

六藝崇射五善遵禮景也張侯職効能於棲鵠賓之遂
貫遠呈妙於啼猿曾不知措策有揖讓之儀飲筭行多
少之節下綱不及如堵奚瞻監者有知莫豐是闕人而
無禮袒決難留以之觀德從何擇士若不論辜是誣怕
憲

同前

王 諲

國將郊禘王有聘享宴而習禮射以觀德大侯既抗敦
彫 一作 弓乃堅天子張熊武之威諸侯異朱玄之殺不及

地武何所失儀高下其綱誠為順理然禮崇三讓無聞
固請之辭射有五容先招不至之誚雖飲於少筭自可
奠豐而獻爾發功方觀袒決於賓微於一作捨禮在景
何所憊儀但欲旌能期於書過

同前

考賢論材審藝觀德爰設三侯之禮以崇五善之儀貍
首登歌是求於合雅采蘋斯奏何先於主皮惟彼武賓
齒于其位宜揖讓中節允諧一作於觀善何穿洞非儀

坐彰於伐德綱則未下射何速如自貽監者之尤遂干
司馬之政不奠於坐誠叶周人之式袒決而還亦符相
圃之事雖君子之爭戒一作所苟得而士師之律未可
深文宜從肆緩謂叶平典

同前

姚承構

開彼澤宮臨茲相圃可以觀德必也射乎所以揖讓而
升審固而動矢流貫的候服親於主皮樂奏采蘩笙鏞
備於和體豈失于獻士而亂於簡能下網靡及於地前

飛羽虛驚於雲際坐奠斯闕袒決而還宣父之妙誰崇
仲由之令何寄且君子之爭應免於嚴科小人伐伎湏
從於薄黜禮律之道斯合宜然

同前

嚴迪

景遵狸步張是熊侯地武苟合於舊儀下網未踰於先
則賓則有藝執射多功舒卷寧懼於出正發縱每聞於
破的彤弓既殷與明月而合規白羽纔飛狀流星而遂
貫然而禮成揖讓不獨主皮徒矜袒決之容未覩奠豐

之事作而非法不足書能人而無儀誠須寘罰

不以騶虞為節判

大射之禮主司不以騶虞為節

對

寇泚

禮經之設寘和天地凡在有司理資虔恪况大射斯御

大侯既張誦驪首以成章歌騶虞而應節匪文匪武載

光於禮容爰遊爰豫

一作爰
豫爰謀

式備於彝典崇折俎之儀

助發生之氣豈得弔弓之旨致闕公宮彼茁之規猶虧

相圃位已乖於司射法須加於秩宗請寘鶴鳩之科以懲樹皮之失

不以采蘋為節判

甲會射制氏不以采蘋為節所由加罪訴稱非三命已上

對

韋述

射以習戰樂本宣風雖君子之所爭乃先王之修訓惟甲幸逢先宅早踐榮班羔裘以朝未登三命之秩主皮

為會咸茲五善之儀興武與同必期多筭和容中質不出于正節未及於采蘋事有歸於制氏欲加其罪竊謂証辭且物有司存孔門垂教失官為慢春秋所規節以樂章誠則大夫之禮非禮不動實惟先聖之暮師古未表其明知禮反招其咎所由斯罰有異繩愆制氏有言誠為舉枉

同前

馮萬石

三皇威察利用弧矢六藝和容率由飲射故澤宮相圃

揆尊卑之節出正中質定賢愚之分既參之以樂章必
備之以禮物甲利乃習妙言會其儀豈徒主皮之善將
勤君子之爭制氏頗曉鏗鏘班乎樂職屬斯登降須狗
疇人寧宜箕箒不修鍾鼓靡奏闕於所守罪亦何疑至
如武侯熊侯自天子而斯達采蘋采蘩一作采蘩由命士
而有差理合各附等威依節制訴非三命已覺詞游
將扣兩端須知甲品請更閱實然後定刑

鄉射司正倚旌判

甲司正命獲者倚旌為有司所糾詞云兼官無事

對

李思元

國有燕饗代存飲射貴以觀德先乎踐禮故比茲六耦
是辨其等威抗彼三侯必憑乎班列眷言伊甲則曰司
存寔掌厥儀克閑乃事序賓明揖讓之則進或厯階贊
射辨升降之儀退惟輔序而決捨是伙弓矢斯調射人
發功非無破的之藝司正命獲爰有倚旌之禮將欲乘
其多筭罰以弛弓使夫沮勸必明威容可則况職不在

備禮或從宜無事則兼寧云離局之過有司所糾實負
曠官之責

賓觀武藝判

乙為賓觀武藝主人三拜不答兩拜責其闕禮

對

李暄

侯以明之射有觀者設中筭以章物立其賓以相儀乙
鄉黨稱賢進退有度將拜至而拜洗且三讓而三揖

一作

接是欲體和容之節知曲藝之美匪惟訓人抑又觀德

豈可空瞻樓鵠未盡主皮尚陳旅酬必候一作興答將
疑飲數故異禮容既不與於威儀亦何勤於偏拜謂之
有闕宜乎未甘

矜射判

樊少翁與箭張迴各自矜尚詣府以迴優少翁不伏

對

李迥

武有七德所以保大定功器重五兵所以禁暴戡亂在
三端而不棄居六藝以為先張迴擅飛衛之功樊少得

養由之妙同觀挂蟲並斷征鳧暫彎繁弱之弓載發忘歸之矢俱窮中質各盡和容未見於撝謙遽聞於矜尚君子無爭必也射乎府司既曰迴優少翁如何不伏

同前

郭行則

少翁繁弱靈苗張迴忘歸遠系各是良弓之子俱膺美箭之名類飭角以甄形攸資定體固鐵羽而成質期乎陷堅蓋取諸睽用明弧矢之利道該於藝允覲和容之能非唯取貴禮經固亦以威天下是處顏高之室稱乎

六鈞寔發養由之弦先於百中論其飲羽本為相資誥
以主皮事非獨善瞻言繕造何劣何優據其精靈徒矜
徒尚文戰而失覺先鳴齊驅而適聞後殿少翁不伏雅
叶道方張廻非優謂符彞典

祭侯判

得甲祭侯辭曰強飲食御史糾非息宴之禮不伏

對

表 歆

唯祀與戎禮之大者觀射見德侯其是歟俾徼福於爾

靈將示威於我衆所以司馬張皇於五射梓人盛飾於
三侯繫而有儀下綱不及於地武祭以盛禮上射更揖
於堂楣是則俎豆克陳熊武相間多筭少筭射人或觥
於示疑作爾爵強飲強食祝史無愧於我辭冀必懲於不
庭是有祈於介福雖非宴禮寔曰武經既庶幾於戢兵
復何疑乎致祭乘驄之糾斯心奚至於加諸而中鵠之
誠彼甲未越其典則禮不瀆也神其吐之

同前

魏兼柔

揖讓而升發彼以折爾爵正鵠苟失必也反求諸身甲
主張三侯是供五射簋貳以薦初陳強飲強食之辭金
奏既動間以采蘋采蘋之節屬九圍有截五兵載橐宜
習禮於澤宮可觀德於相圃下綱不及於地武中掩以
待於張弓惟若寧侯則抗而祝也所以擇士乃與之祭
馬稱非息宴妄為柱史之糾觀其守職未失梓人之規
無咎可徵甲免夫戾

同前

李挺

澤宮舊典相圃遺法實備多儀亦彰異數至若一日之
澤息物休農四牡既朝勞動式宴於是取像貍步設廣
庭之禮物載張獸侯量下綱於地武射之義也豈直主
皮神則憑焉必侯工祝羞酺醢之嘉薦陳儆戒之順辭
或中鵠而升則實爵以獻終乃示其慈惠庶將強其飲
食正依經禮寧畏簡書爰詢栢署之言未達梓人之職
甲之不伏可謂守官

同前

秦用

五善與能三侯是列俾射夫有獻庶君子必爭甲藝窮
決捨心惟審固成規月滿則先張之弧如破風馳能發
彼有的對梓人之成器受司馬之滿觴祭則有經辭豈
失舊既不寧是抗非貽福謂何且使臣農夫息宴以禮
而主皮栖鵠降殺異宜如或獸侯斯張是則芻冠虛觸
尚迷歧路更佇指縱

同前

姜庭琬

祭以主敬射以觀德三侯既設遂聞熊豹之差二簋可

享爰申脯醢之奠甲進退有度揖讓而升方備於五善
詎界於六藝有如武子之妙以取牛心類后羿之能無
全雀目祭必如在神當格思唯寧者立以繼代不屬者
抗而射女強飲強食陳祝史之正辭克禋克祝介曾孫
之景福必也正其齒位稱彼兕觥將勞農以休息乃示
宴以惠慈鐵冠所糾恐未三思鉛刀見用終資一割同
於噬腊難以甘心

馬驚師徒判

卜氏為御馬驚師徒小却監軍糾為無勇卜氏遂死之
或誅其功監軍請寘乎理誅者執云非罪

對

梁庶

戎御近官事資良藝或逐禽而過表且并轡而授綏克
敵是因搴旗攸屬卜氏叅名訓僕奉職佳兵懸父之馬
或奔晉侯之車將敗師徒小却鉦鼓微旋既獲譴於言
司載興慙於無勇鳴轂小故猶有伏劔之臣敗軍大尤
須聞免胄之容是用捐軀不恠

一作

視死如歸東野傾

轅雖則其罪國書殞首終用可嘉足比乘丘之能宜錫
滑臺之誅庶執死節以寵鬼雄

同前

楊仲昌

師貞以律大易微言羣吏聽誓先王垂則卜氏致躬廝
役頗事戎昭似乘丘之物立寧執御而無勇遂使秋

一作

仗還塞比介冑慙容日暮城南鼓鼙傷氣監軍執簡而

往操刀必割冀圖賞罰以制忠邪但授

一作

綏匪憊流

矢斯驗嘉赴敵以徇節亦議功而何妨禮經孔昭誅德

惟允實卜也之非罪宜捨諸而無惑

同前

吕令問

將執御乎必使能者伎苟有素失乃非愆卜氏御戎豈
其敗績六藝之末尚勤夫子之言十乘之先遂執王良
之轡既而師貞以律騎勇爭鋒外強中乾忽陸離而莫
制大軍小將却遷延而欲奔非馬其人異叔牂之沒怨
有矢在肉知責父之非罪圍人以告誠合誅之生也不
欺將子無怒

同前

梁涉

赤羽相向魯戴乘丘之役紅塵交飛國驂賁父之御事
足蒙馬力均投牛變非銜擻驚為流矢殊郤克之不止
因潰齊軍成魯師之小却便亡卜氏汙朱輪豈敢言病
驗白肉乃知非罪逝者既往吾誰與歸死而可哀士始
有誅此馬真理孰曰監軍雖欲必也正名是故惡夫佞
者

同前

褚思光

卜氏習聞秋駕工隨水曲屬出車檻檻有六月之師將
執訊連連成九天之勝而深谿難拔小駟易驚殊攝叔
之致師有懸賁之敗績是無勇也於此死之監軍糾慝
未窮通憲必若馬為流矢所驚人殊執轡之罪則死非
其道一作過誅得其功率象前聞寧宜寘理

同前

楊慎金

邊候時驚聞列將之授師戎車啓行有僕夫之執御白
刃交下望軍麾而且前紅塵四飛聞戰鼓而俄駭甚朽

索之為御因交綏而小却疇昔為政雖異羊斟不仁今
時敗績還同卜國無勇結纓而盡復矢空非請易其名
蓋難霑於下士將寘于理焉可罪於亡魂雖聞舊經非
辜當失不誅不罪斯焉取斯

同前

劉濬

登庸取士六藝稱先設策除兇五兵是要卜氏為御招
尤於馬驚監軍正刑志存乎鷓逐昔懸責理御嘗聞流
矢之災卜國佐驂遂彰白肉之患有功必賞有犯必科

未明敗績之由須覈馬驚之故請重尋詰然定是非庶
使幽冥申冤功過昭著即寘於理深涉乖踈

射不穿札判

得甲獻弓蹲甲而射不穿一札有司詰之辭云液角者
不得牛戴牛角

對

白居易

貫革乖方則宜致詰相角失理亦可徵辭甲奠體以成
執簫而獻中規無一作不撓六材雖則合三捨拔有憊七

札不能穿一且集作宜恐傷人之甲不曰堅乎而非戴牛
之弓無自入也液信虧於巧者射遂爽於臧兮周典足
徵彼自乖於三色楚君明試此無愧於二臣咎且有歸
責之非當

欽定四庫全書

文苑英華卷五百十四

宋 李昉等 編

選舉門三十道

舉似已者判六道

舉方正者判三道

舉嘉遁第判一道

自舉判一道

舉人倨傲判一道

自比管仲判一道

貢士不歌鹿鳴判一道

鄉貢進士判五道

貢士帖經判一道

括州貢士判一道

獻賢能書判二道

舉賢任選判二道

被替請選判三道

詐假求官判一道

知名配社判一道

舉似已者判

丙充使舉似已者御史糾按丙稱但成三物唯善能之

對

陳齊卿

舉善國經為善身守有觀風俗俾擇賢良故輒轉

一作傳

一封尚且通於鍾律埋輪八使豈獨懼於豺狼丙以星

車達諸天府惟賢能似雖讐不忘御史彈違蒞職肅物

臨人謂無失於奉公乃見傷於與善使苟為酸邁

詩東門之

粉酸邁訓總聚而行但其下既引羊舌又疑是酸邁

畏此簡書則羊舌廢而不興

祁奚誰其請老制命為義然暫威於柏臺察理蒞仁終取連於茅茹欲成三物方建一官所糾之言其細已甚

同前

屈突潛

天生蒸人樹君以牧國有理體得賢其昌丙人伊何縻我好爵發揮王化對揚天休整日馭以觀風駕星輅而

問俗方欲庶績其疑伊又九功式序搜遺逸於巖藪訪
才能於草澤舉不失德推皆似已既無替於拔茅亦何
慚於擢一作折挂且繇則廢命禹乃嗣興奚其歸老午也
膺職內不予避外惟讎舉建茲一官成彼三物自叶彙
征之吉寧失鶴鳴之義憲司所糾誠為妄作不能沮勸
忽肆淫刑參則不敏未敢從命

同前

裴春卿

受命觀風光膺耳目停車輟駕是收疑作收翹楚知之不

遠十步自得於芝蘭行之有鄰千里方聞於應會惟彼
舉善誠為好德出門無與於同人投士遂多於似己類
初奚之直道有范滂之遠心建一官而三物克成舉十
室而四方知勸皇華允美所謂伊人白簡以聞徒為此
糾

同前

獨孤峻

舉賢無私惟善所在苟利社稷無恤其他

疑作也

故德能

佐時彭仲超於令尹才堪御敵觀父統於三軍唯得其

人似已何真且魏獻舉代初奚薦讎將利國是資不阻
親怨以進賢為務寧問回邪故能建彼一官成乎三物
先賢所尚君子避之事以類分云胡不可瞻言丙也直
指是稱舉爾所知何敢沒沒良才衆矣多舉何妨御史
繡服霜華聽威電發將違執秩言寘僕區曾不知獄也
放紛刑乎頗類見左傳昭十六年
子產曰刑之頗類淫刑已逞誰則無辜
得善誠則可嘉糾按斯為戾也

同前

房密

進賢受賞求善以類苟有拘於廉能固無嫌於讎黨夫
不惡汝句柳翔方為於柏人孰可代之伯華旋佐於軍
尉事不為諂舉乃斯得以成三物奚獨一官且王命使
臣匪躬之故位多君子何限之拘方勵時而激俗寧守
文以牽制能舉善也唯其似之大夫之中則聞於祁氏
御史之糾無為于魯人宜加爵地之榮勿陷功賢之議

同前

李翥

父教于忠為臣不易知人則哲惟帝稱難任官惟良底

祿以德莫不進方正之士獻賢能之書詩詠繡裳禮設
庭燎衣冠濟濟鳴玉珮而來朝文雅錚錚望金門而待
詔初大夫之請老內選其親范文子之讓能豈遺其舊
皆舉不失職義不在私晉國建其一官魯史成其一作
三物士過知己唯其似之覩星使之來儀長歌棫樸覽
霜臺之糾謬反示疑狐裘寧假有辭自然無咎

舉方正者制

京兆尹舉方正所舉者召見槃辟雅拜有司以詭象虛

矯奏請左遷

對

張萬頃

漢辟賢良周升俊造求我士庶登之于朝谷爾大夫褒
然為首以弼余教將沃朕心况張敞尹京孫弘待詔軒
墀中禁襜褕上謁如咫尺之在顏何樂辟以為禮將三
命以必走奚九拜以愆儀然惟才所難與人無備焉可
納虛詭之說畏賢能之書苟上第之得人豈左遷之云
罪試可乃已吾無間然

同前

崔珪璋

制祿受寵以身許國夫不舉賢宜其削地故何武所薦
先於宗黨孫弘慎擇果得詞林至如官則尹京爵為上
秩問馬未能於鈞距推賢乃見於槃辟且不求備寧責
於周旋如或可收豈徵於拜禮應屬天顏咫尺對敬失
墜楚材儻以堪用卞璞詎宜便捨欲求上賞更俟試時
因奏左遷孰云其可聖朝刑尚不濫舉賢理合從寬向
觀稽首之儀未成不削之罪

同前

李伉

四方取則西夏為樞九流待問東臺是急若舉不失德
實人所具瞻而肅穆清規崇巖丹陛登清光於霄漢不
違顏於咫尺則當進退禮容孰聞樂辟雅拜既無觀於
叔氏亦何取于鄒人有司上聞攸資伏念儻使廣成不
遠應無北面之尊綺季或存未屈南山之老試可乃已
誰謂不然

舉嘉適第判

巖虛應嘉遁科舉試策及第選膏為非時進擬經臺有
喧訴選司以虛名乖實貶第

對

徐楚壁

巖虛草澤賢才蒲輪辟命玉臺對問既則登科仙署縻
爵誠宜利用抑同選調詎曰非常坐見淪塞行招往訴
然則晦其跡也事等鑿坯行其道焉何論負鼎諒出處
之有異豈名實之相乖義在優賢理無貶第興言舉主
誠則知人賞先茅之地非無故實奪闕田之祿未之前

聞循彼功曹以為直筆

自舉判 缺

李昇朝

舉人據地判

標目作舉人倨傲判

穎州常居於木屬舉刺史問所能乃據地而言刺史將為奇才察吏為詞色倨傲不堪獎仰處分

對

韋希顏

常居汝穎奇才丘園高士千進二千石自謂五百年陳思王之藝能唯聞自舉馬相如之文藻故且先容蓄銳

門庭審屠龍之已就露才州府望維駒之有期舉善進
賢英翹是務負才任氣倨傲何傷計吏猶揖司空處士
何卑刺史或是栖遲之侶禮律未闕流宕之夫拘檢不
足取優退劣赦過舉賢庶以為宜未敢懸定

自比管仲判

無是子恒居草廬自比管仲云夢乘舟邑人告其虛誕

對

李昇朝

國家頓網鴻鴻廣羅舟楫人降三傑俾機務允釐天飛

五老而元氣清晏猶且弓招歲下徵拜日聞無是子毓
德郊扉澄神虛白效宣尼之竊比無踰老彭徵武侯之
故事終期管晏雖復跡符媒銜終是志越儕流或未可
量有足嘉尚昔月中見字尚表英童今夢裏乘舟故符玉
佐但聖朝以丘園佇秀物色求人乘箕降昴之賓金礪
玉璜之相必循名實方踐台階今者邑子薄言告以虛
誕且鄉人所惡未可即依翁歸自陳亦難憑據言之無
罪告上何傷

貢士不歌鹿鳴判

甲秀才充貢郡送不歌鹿鳴之詩

對

苗收

總目
作牧

甲才惟國寶秀彼士林孫弘適見於贈芻卻詵佇希於擢桂既奉鄉賦將觀國光雖賓薦可嘉而禮容未足鹿鳴不奏鳳德何衰爾闕其儀我愛其禮乙有言矣郡何詞焉自速其尤誰曰無咎

鄉貢

一作舉

進士判

鄉舉

一作貢

進士至省求試秀才考功不聽求訴不已

對

趙 岳

鄉大夫之興賢最

疑作能

大司徒之論俊造既升司馬又

告諸王天府拜而已登內史職為其貳周云進士漢曰

秀才在今日之區分非曩時之名數文藝小善進士之

能訪對不休秀才之目美彼良士賢乎我師以窮鄉之

莫知徒舉其小庶會府之達識即致其大亦猶鯨魚之

鼓溟海歎蹄涔之暴鱗驕駟之局中庭望雲朔而驟首

考功自可表其秀傑拔以殊倫縱常式之文不歲登其尤異急賢之地宜日新於進才聞言不聽斯為蔽矣試可乃已何至是乎公使湮沉坐令求訴

同前

漢辟賢良堯徵側陋庶見拔茅之彙方資刈楚之才故選彼鄉閭貢之天府始策名於進士誠合明啟終求試於秀才一何乖謬既離局以干事方越樽而代庖薄訴雖多厚顏奚甚國章攸著甲令斯存考功不聽誠則無

爽

同前

講信明義脩詞立誠豈唯潤身且以干祿

一作以
干祿仕

德成

而上充歲賦於司徒道在則遷嘉名聞於會府叩兩端
而入仕博之以文論二舉之殊條奪之於理尋擇賢之
意無遺十室之才詳歷試之規寧隔四科之秀循名責
實雖在司存改業惟人何求物議

同前

權寅獻

拔茅稱吉大易至言刈楚飛音詩人起詠進士以鋪翰
振藻見舉於鄉閭文麗筆精允光於省闈據才雖稱片
玉無狀須依一名出敬梓之鄉但論進士入握蘭之署
旋求茂才名異奏名事便迂僻訴非訴禮義甚乖踈瞻
乎不已之詞何哉無狀之繆請依鄉舉謂充公途

同前

髦俊之侶鄉曲有聲閱五車之墳籍光三道之詞翰是
得咸充歲賦各騁翹材喧一作鶯谷以載飛歌鹿鳴而

入薦既臻華省方得甲科但以進秀異名考試殊例不應本舉誠恐非宜考功不聽良為允當訴求不已何大乖踈

貢人帖經判

漳浦郡貢人景帖策不通所由將坐郡守云未成公仰處分

對

張憑

惟賢是舉慎擇為先明試以言得失斯在惟景策名歲

貢待扣禮闈將登甲乙之科翻速主君之戾何則帖茲
學圃既謝專經策以詞林仍非善中遂使仙臺清鏡徒
訝於才難幽谷遷鶯空悲於歲晚顧惟州將豈曰能官
據條雖未成分於事恐非公薦景當貢請用遠郊之
禮守舉非才宜從削地之罰

括州貢士判

括州

括州即括蒼也大歷十四年改為處州

甲貢士少

對

諸葛若驚

諸侯列一貢士有差稱彼地靈登之天府括州水鄉遐
服台嶺仙區梓漆標材幾馳聲於俊造竹箭為美亦飛
譽於東南頃以充賦上京頗規前古在寨帷而未失何
直繩之見欺然則國家獵異搜奇招弓頓網移鄧林之
茂樹接影槐庭掩澤國之環材連芳芸閣既惟新而製
典何背禮之云稱廉使此推蓋申朝憲州將雖拒有味
隨書

獻賢能書判

甲歲終致事不獻賢能之書御史糾不能教其所理辭
曰待經三年則以禮賓之

對

宋 昱

考藝尚實進賢受賞必久於其道乃不失其人甲也齒
鄉職於股引觀其所與以德行為先察其所安則文理
為後縱舉不失選僉曰能賢猶同三年乃賓以旌五物
無棄筐篚以將其意笙歌以勸其從儒者為榮詞宗立
志始於司徒授法終以大夫獻書俊寵於君舊史每令

於續食成賦於國前王肇俾於計偕將慎薦延之儀遂
下崆峒之拜登于天府貳於史職當由致事之歲則匪
掄才之時卿則守官諒不愆於侯度臺應情理頗有乖
於紀律有詞不伐無簡可聽

同前

鄭璉

國有地官以帥職鄉則大夫而列位政無苟貳命在奉
初告于鄉里頒司徒之禁令期於歲時登夫家之衆寡
眷言甲者斯馬從政既受其法如璽印塗將教所理猶

金在鑄是以俊造察本於鄉閭賢能薦登于天府同谷
永之舉士不失薛宣類周瑜之貢才無遺魯肅况致事
有典大比作程詢衆之暮義存五物禮賓之飲道在三
年作良命官是甲未聞失德賞恭罰否彼憲何其謬繩
舉賢任選判

得上封事人云吏部計選不得其才請命公卿舉賢而
任所司云知人之難恐不絕私非選士之策

對

鄭察

底祿任人惟賢是務居位稱職無私乃可况爰設天官
俾司衡鏡審輪轅之目每得山公表清通之心更推裴
楷固不失士將無棄才何必咨爾公卿獲我髦彥雖鄉
舉里選則有附於曩時而操柄執權諒難廢於今日且
如知人匪易絕私尤難前王以之則哲五倫猶是自疑
家官必擇夫至公庶流自息其貪競議乎經久曷可因
循愚謂上封未協中道

同前

盧 貽

求賢審官分職揆務必資慎擇乃罔姦邪惟彼禮闈式
蒸髦士固亦品藻而無失夫何銓管而是昧所以懷山
濤識量蘊毛玠公方擇其琳琅雖云非允刈乎杞梓孰
曰謬賢嗟爾伊人議乎取士類匡衡之述古多所引經
同谷永之上封屬一作獨將言事教隳邦典政敗豎儒且
涉緣情殊非革弊天官嘉是是曰司存月卿薦賢恐成
離局

被替請選判

丁授官累日被奏替請非時選廢置不許云準勅旨冬
已過旬限丁訴云今正在冬當替只在下牒之日且辨
論官材不合拘以限約廢置又執賢能以歲時入其書
豈可無限

對

牛 聳

用行捨藏宣尼所誠難進易退老氏格言伊丁劾官先
甲入用曾未浹辰見代而解乎印綬已在後時參選而
趨乎衡鏡雖牽絲失位情有可矜而如綸與能材或無

取誠宜委命而去何至滕口與爭但使如珪如璋不借
不濫弓旌自辟仁遠乎哉今則天鑒孔明星郎守法進
退不遇斯害也已吏曹引乎周禮前言是徵丁意味於
隨時厚顏何格告令知分用止躁求

同前

敬寬

底祿命賢諒存於考覈懸象班令克定於程期無慢國
經必遵王度哿言丁矣庶得人馬登書拔才量能授職
始望政成人化冀及三年而乃褫服抽簪曾不累日屬

參選限勅而詣訴過時徒思揚已露才豈可違文破格
然已而靡愠嗟有異于子文留之物移傷不過於黃霸
誠哉廢置寔曰司存引明周典之文詎忝冢官之列興
言不失宜室有詞

同前

王 沼

任良牧官著國典而為重守法立度在所司而靡踰丁
筮任策名掄材受署既而天書荐委寧俟及瓜之期會
府陳辭重希刈楚之選官纔登於累日時已後於三冬

允哉廢置明乎用捨雖進賢是急冀開取士之門而嚴
初不移誠曰在公之義訴而不納信謂得宜况歲其書
事有徵於前志不拘以限亦何聽於薄言請俟他年無
隳舊典

詐假求官判

乙詐假求官科其罪訴云求而未得詐偽

對

蘇寧

為官擇人聿求俊義強學干祿必正科名彼乙伊何不

求諸已射官明試無聞六義之能藻鏡掄材將辭九流
之序况今唐虞御極才子在官王裴持衡至公選士方
聽得賢之頌寧容詐假之辜顧三面而闕
斯宅
既稱未得須議減論

知名配社判

甲知名早卒郡守配食縣社糾不法曰恨不及之

對

敬括

駿馬雖死猶聞市骨秋蘭縱敗因或損香詢訐乃甲名

器無瑕稟諸葛之美秀幼敏足稱韞子然之材能早代
何速恨疑良者守克尚于賢仰之彌高未經旌其閭巷
思而不見聿將配乎縣社俾善政彰聞下人悅勸伊可
避也何其糾之宜高孔氏之言無取使司之見

文苑英華卷五百十四

欽定四庫全書

文苑英華卷五百十五

宋 李昉等 編

禮賢門二十七道

小吏歡言判四道

薦賢能判五道

寢延部人判三道

志行高潔判一道

舉抱甕生判六道

貢市井之子判一道

選人代試判一道

拔萃相非判一道

取名士判一道

教胄子毀方瓦合判一道

試選人繼燭判一道
徵辟不起判一道

小吏歡言判

景與小吏歡言倨見功曹將黜不伏

對

康子元

義在斯合借容猶重於將軍道或可存縫掖未輕於太
守景歡言小吏將疑十五之詩倨見功曹無近三千之
律耕耘禮義儒行已申於仲尼嘯傲風雲高節未屈於
光逸雖闕循牆之敬豈干銘鼎之科將加譴黜恐乖寬

裕希從理遣無重斯愆

同前

毋嬰

聲同律和氣合形比渡遼捨鴈門之守獨挹書生中郎
捐座客之談方近處士吁惟小吏職在含香光逸有著
於美名李斯果昇乎列位神期暗許能紆長者之歡精
義其同何廢達人之話功曹望慙樂廣才謝范滂空嫌
倨見之輕遂啟黜賢之責不省諸已翻欲退人巡覆再
三匪聞其可磁石非曲斜之取武魄無俯芥之收拾凡

就能幸從其議

同前

鄭少微

智士敏德難進易退明識流鑒察微知彰與善無求於
貌恭選能何限於廝役一言而善三語攸升交匪竭歡
談仍詣理不乏吾事在小吏而非辜無速我尤何主吏
之頗類不從棄黜深謂得宜

同前

景與小吏歡而且言不勤無傲之心旋得有皮之刺恭

匪近禮信則承羞黜而未甘或難奪志若使才不足美
怠而可尤必也德有可甄倨而何責徵諸故事折有其
倫鄜生見重於抗詞元淑無嫌於長揖與其詰過寧取
優賢

薦賢能判

甲薦賢能之士三詣公車試皆高第表請錫彤弓矢廷
尉致詰詞云三適有功

對

趙子餘

建官惟材言刈其楚為政以德行歸于周甲徽華國章
夾輔王室允茲好德是用進賢禮盡異能褒然登於漢
室策選巖穴咨爾置於周行既三適於公車宜九錫以
觀國且得臣敗楚失在子文夷吾霸齊功歸鮑叔寵錫
既傾於彤弓將命必議於太常致詰豈煩於廷尉儻任
刑而廢禮猶越祝以待庖既見侵官未能唯命

同前

甲何人斯惟曰舉善士異其行先乎薦能如祁大夫則

仇讐不避若隨武子乃管庫先登才膺明試雖公車之
是辟事匪專征豈彤弓以為請名器不假車服以庸信
有德之可嘉終無功而何錫致廷尉之詰雖三適稱勞
異諸侯之勲而百矢奚用典禮不易事義斯存

同前

沈東美

舉善惟微知人則哲妙聞音者識窮山之竹能追芳者
賞幽徑之蘭甲位登八命才高四岳言刈其楚有異錯
薪載繫其駒屢聞驤首文舉之昇一鶚陶洪之披

三國志陶

丘洪云御二龍於長塗披字疑

二龍曷足思齊寧將比價懿茲擢桂便

請錫弓自伐誠則躁求議功何妨懋賞稽諸漢史軌躅
昭然名器不可假人升降固宜合禮爵土互錫理或酬
功弓矢斯張雅符謬請六卿司過三適胡為

同前

王昌齡

俾爾公侯敬服王命乃升賢俊昭宣訓典惟甲蕃屏有
垣既孜孜於審擇黜陟咸若亦賢賢而脩貢三詣三適
登漢室之明科九德九徵贊虞臣之寅亮有如取火於

燧故能任事加爵且汝惟勿伐則繼珪瓚不誣今也自
賢豈曰彤弓是允與其表請執若謙光廷尉有詞匪伊
妄作

同前

劉潤

唐堯稽古時謂能官周文小心號稱多士雲龍感召鸞
鷲充庭蒲壁交衢弓車荐委薦異能之士採非常之德
遊大學而橫經詣公府而高第驥足千里同主父之三
擢桂林一枝恥公孫之十上爰求九錫之命以旌三適

之功惟甲書生可貴能移太守之尊小吏雖卑猶奪宰
君之望在道雖云可重傷倨無宜寘刑理存優賢不勞

加點

此篇惟甲以下
四十二字疑誤

寢延部人判

撫州別駕豆盧安舍正寢延部人乙弗乾公事稟而後
行所由舉不法安不伏

對

負峴

端右之寄古人為難先我大邦抑惟良政豆盧安雅有

通識率由舊章呂虔推其佩刀諸葛稱其驥足好問則
裕高步於丘門有道可尊且懸於陳榻舍茲正寢延彼部
人饑渴良圖咨謀雅道昔干木賤士文侯尚且軾閭侯
嬴匹夫信陵以之虛左重其所部望古何慙舉此為非
愚所不取

同前

豆盧安幸屬清泰早襲衣冠陪去獸而宣風贊還珠而
緝化題輿就職行聞仲舉之風展驥臨人坐振士元之

躅爰於正寢延茲部人罕言私情但舉公事乙弗乾既
奉嚴命稟而後行論情未越於古風據理何乖於即事
王子之臨東海雖未贈刀盧君之撫南康終其化鶴所
司妄舉將有味於條章安既有推詞請從於緘默

同前

劉光

王祥望職久著傳刀龐統良材攸稱展驥承上接下故
宜自己而行舉目提綱或可稟人而借如鄭產流譽尚
採鄉校之言晉侯質疑猶聽與人之誦則智有不達材

有不通江海以納流為大君子以訪賢為美子賤之居
茂宰實稟度於邑人何晏之任尚書上闕懷於談客孔
丘既稱其善史臣不敘其非按舊章而可憑明所司之
妄舉安今不伏良謂有詞

志行高潔判

得甲志高潔遂為時人所宗有司詰之曰景前時以為
通而今以為介是不恒人也請斥之甲云景雅尚自若
而論者或異不伏

對

李暄

國著進賢之賞人思類能之用欽崇慰薦敦固引繩野
無遺才邦有大任甲方伸已志將舉所知毛玠當仁克
尊徐邈孔融明敏無棄禰衡見機一作貴乃通達之人失
道為草一作井介之士隨乎去就順以行藏不會適來

之時將疑過後之行寧問管鮑之厚孰存莊惠之深其
於有司未曰知我居然請斥何哉失辭

舉抱甕生判

河南東道持斧舉抱甕生或告云矯州科生妄罪不伏

對

王利器

大道潛運羣動無心明王德孚庶物適遂由是山栖谷

隱常有居巢之人鬻蔬灌圃一作園時聞抱甕之叟屬旒

冕側席載勤於夢卜繡衣持斧博訪於丘園皇華以知

無不為誠朴畧之可尚或人以多聞博識明渾沌之非

真跡初兆於行藏事有同於倚伏舉者縱非折衷猶或

獻芹科者貴叶平反無宜一作疑寘棘愚之寡見告記為

宜

同前

王冷然

使臣巡方天子錫命有能利國無待受辭况詩著考槃
易稱嘉遁清高勵俗義道周身致為舉先可以師者御
史歲觀風物夜動星芒路出河東載馳駟馬地疑河上
便遇真人將觀善以懲違遂薦賢而報國逢萌既達疑作
違威辟莫辨東西法真一作慎又作振非不以禮迎何能進退
由是黃金見鑠白玉成瑕雖莊周道心以枯槁非本而

子貢利口乃渾沌假脩人既無情罵叔丈而稱矯州寧
妄罪鞭甯越以成威

同前

馬翊

濟濟以寧實惟多士彋彋所賁其在旌賢且抱甕之生
代稱高尚垂竿投釣寧殊渭水之公灌園鬻蔬不讓漢
陰之叟御史以皇華動俗馳馬生風有隱逸而必求無
賢才而不舉今當所薦理合其宜復有澆薄之夫淳和
詎識季孫讒於子路未損其容武叔毀於仲尼何傷其

德寧使挂瓢之輩道以矯時飲犢之流人稱為妄州司
處斷未曰通途

同前

張景

弓旌待士東帛登賢授方任能察言觀行雖三微改運
文質有殊百代可知風聲不替國家克明俊德無曠庶
官多士斯聞得人為盛猶恐考樂有作邁軸生詞思草
澤之遺芳憶山泉之逸賞傍馳鶴板博訪龜枚將求異
等之才載下非常之制方書執簡直指觀風澄清之道

莫聞黜陟之宜且昧海隅沉隱未薦褒衣漢陰矯識翻
稱抱甕詳延不中使司自是疎遺混沌假脩野老若為
加罪

同前

張法

詩詠考槃易稱嘉遁聲流載籍美播丘山誠出處之多
途乃蕭蘭之或致至若丘中一作立老圃漢上棲神跡徒

挂於幽閑名未通於束帛既而金潭洗菊不暇優遊玉
甃滋園徒施混沌御史乘驄按俗持斧臨人有悔必彈

聞善斯舉然以羸瓶小節抱甕微流責然來思竊用多
愧或告云矯深柰前聞生也不甘如何厚貌

同前

世道交喪文質平易朴畧之緒眇焉不退混沌之萌去
之彌久眷言持斧庀我王職將鎮風化是旌漢陰子子
干旄雖得詩人之詠悠悠抱甕仍招孔父之責或者之
告不其宜乎假脩之名於是驗矣然刑克以當遁真存
肥甯越尚不致科巢父如何詰罪免夫度外竊以為

得

貢市井之子判

得州府貢士或市井之子孫為省司所詰甲云

集作稱

羣

萃之才

集作秀

出者不合限以常科

對

白居易

惟賢是求何賤之有况士之秀者而人其捨諸惟彼郡
貢或稱市籍非我族類則嫌雜以蕭蘭舉爾所知安得
棄其翹楚誠有惡於裨敗諒難捨於

集作其

茂異揀金於

砂礫豈為類賤而不收度木於澗松寧以地卑而見棄
但恐所舉失德不可以賤廢人況乎識度冠時出自牛
醫之後心計成務擢於賈豎之中在往事而足徵何常
科而是限州申有據省詰非宜

選人代試判

得乙充選人識官選人代試法司斷乙與代試者同罪
訴云實不知

對

前人

官擇賢良選稽名實苟作偽以集作心拙必代斲而手

傷乙情匪容奸行乖周慎將如吾面遂充識以不疑未

見子心果代試而有悔既彰聞而貽戒乃連坐而集作

論辜察情諒不同謀結罪誠應異罰法無攸赦選者當

準格論人不易知識名所宜情恕削奪恐為過當貶降

庶叶決平

拔萃相非判

得乙與丁俱應拔萃乙則趨時以求名丁則勤學而待

命二人于有相非未知孰是

對

前人

立己徇名則由進取脩身俟命寧在躁求智乎雖不失
時仁者豈宜棄本屬科懸拔萃才選出羣勤苦脩詞乙
不能也吹噓附勢丁亦恥之躁靜既殊惟習遂遠各從
所好爾由徑而方行難強不能吾舍道而奚適觀得失
之路或似由人推通塞之門誠應在命所宜勵志焉用
趨時若棄其葑菲失則自求諸已儻中其正鵠得亦不

愧於人無尚苟求盍嘉自致

取名士判

得選舉司取有名之士或云不息馳騫恐難責實

對

前人

聲雖非實善豈無名不可苟求亦難盡棄屬時當仄席
任重掄材思得士於聲華懼誘人於奔競若馳騫而方
取慮非歲貢之賢儻集作如寂寥而後求恐失日彰之善

將期撫實必在研精

集作情

但取捨不私是開乎公道則



吹噓無益自閉其倖門名勿論於有無鑒自精於舉措
教胄子毀方瓦合判
前 人

此篇當在五百一十二卷師學門今已移入此姑存其
目

試選人繼燭判

得吏部選人入試請繼燭以盡精思有司許之及考其
書判善惡與不繼燭同有司欲不許未知可否

對

前 人

旁求俊造迨將筮仕歷試文詞俾從卜夜苟狂簡而無
取宜確執而勿聽萃彼羣才登于會府惟賢是急慮失
寶於握珠有命則從何集作許借光於集作而秉燭及乎考

覈罕有菁英屬詞既謝於揀金待問徒煩於繼火將期
百鍊之後思苦彌精何意一場之中心勞愈集作適拙曷

如早已焉用晚成敢告有司勿從所請

徵辟不起判

得乙隱居徵辟不起于孫請以所辟官用蔭所司不許

對

脩身獨善寵則若驚制爵尊賢命其難廢形雖遺於軒

冕蔭宜及於子孫乙貞以自居辟而不起鶴書下

集作莫

顧雖忘恤後之心爵命已行寧闕賞延之典若使死無

用蔭生不及榮何成旌善之風宜

集作且

是廢君之命揚

苗不食誠自絕於縶維葛藟有陰義難虧於燕翼請

優後嗣以獎外臣

無出身判

得乙居家理廉使舉請受官吏部以無出身不許使執
云行成於內可移於官

對

前人


選調

集作
調選

正名誠宜守序敷求懋德安可拘文乙積行

於中聞彰于外廉使以道敦知己欲致我於青雲天官
以限在出身將棄子於白屋事雖異見理可明徵掄瑣
瑣之材則循舊格割翹翹之楚寧守常科幸當仄席之
求無惑刻舟之執况自家刑國移孝資忠既聞道不

虛行足見舉非失德所宜堅決無至深疑



文苑英華卷五百十五

欽定四庫全書

集部

文苑英華卷五百

十七至
二十

詳校官給事中_臣李臺

助教_臣常循覆勘

總校官進士_臣朱鈞

校對官中書_臣金光燧

謄錄監生_臣蔣如燕

欽定四庫全書

文苑英華卷五百十七

宋 李昉等 編

祭祀二

祭山川百神門六道

不供祭用判三道

祭七祀判一道

百神判一道

鬻辜祭不供物判一道

祭宗廟門十一道

鬯酒不供判五道

太廟登歌判一道

造禰判一道

薦新判一道

掃道判一道

祀玉判一道

犧牲判一道

祭山川百神

不供祭用判

丙奉使沈埋虞人不供其用

對

國之大事必存乎祀禮有五經莫重乎祭故肅事享薦

雖不祈求而歆馨碩德是資昭報主上纂堯丕緒欽虞

大孝是卑宮室固非為已用崇享祭其以佑人故臨遣

制使聿脩祀典飭躬戒告展事采錯

司馬相如封禪書作展采錯事捧

玉

一作

幣潔牲牲盛儀宿設嘉樂具舉川先河後得沉

浮之儀因方即陰合瘞埋之禮比時具物責成存乎有
司虛中慮事先令期於使者彼何為爾而敢闕供夫惟
虞人不應無訴

同前

厚德載物山澤通氣珍恠期產虞衡是職無幽不通在
山川而有事至誠則感故鬼神以是依惟丙肅將天威
祇若事典式崇望祀之禮用展沉埋之義而虞人不虔
祭物有闕各守爾典奚曠於庶官莫恭其職自貽於伊
咎請舉虞人之罪歸於士師之辟

同前

社稷五祀山川百靈有國有家是尊是奉徧羣神而致
享環一作理四時而不忒爰以使臣巡行郡縣職茲望秩

之事宗是沉埋之禮或陳典法無替虔恭况徼福假靈

沉璧埋幣固不祇肅通乎至誠蘋藻方薦粢食不鑿神

疑作禮官博士分典斯務庖人尸祝各守是司事或有違

罪將何道且我愛其禮一有而兩二字闕供由一作是其寘罰神

歆其潔克誠可以享斯眷彼虞人掌茲山澤不守其祀

自貽厥憊宜寘平刑以懲不恪

祭七祀判

甲為鹽人緣祀中雷供祭或告慢神訴云於事無失

對

邵瓊之

國禮在祀先王志其嚴潔神歆惟德執事期於肅恭苟
有孚於蘋藻固非馨於黍稷鹽人職列周官事供王祭
因潤下之成用備奉上之班司屬夏禴爰臚羣祀咸秩
孚薦饗於中雷式虔誠於內饗五材之味或爽七祭之
容遂闕然時有異同事有隨變至信為用且一作誠應明
心饗飪不虧何傷介福既異不供之罰難科作答之刑

百神判

將祀百神差日有司不舉

對

講信脩睦禮行於時人和年豐神降以吉屬歲陰云暮
田峻至喜農事不作役車告休於是乎具器乎薦陳粢
戒掌答成功於衆神設禋祀於大蜡雖既滌既灌不騫
不忒日違精擇神將曷歆吁嗟是司不謹有職昔仲尼
觀魯助祭興於喟然今太卜差時儻神失於顛若祝史
陳信其多媿詞司存不舉坐寘恒罰

鬻辜祭不供物判

以鬻辜祭百物不供

對

水旱雩祭山川沉埋畢為雨師斗亦司命順四時之序
祈萬姓之福鬻辜充祀於百物望秩備禮於四方事或
闕供罪亦斯得無止風之磔狗同告朔之餼羊卜而罷
郊以著春秋之失祭而廢禮宜投司寇之刑

祭宗廟

掃道儀
牲附

鬯酒不供判

太常申博士請鬱鬯酒光祿以久無匠人且金草不知所出不造祠部亦以為禮有沿廢不允所請寺執見著唐禮豈得不行祠部云籍田准令兼給廩犧籍田今或不供犧亦廢用酒無鬱鬯於事何闕寺猶固執

對

趙岳

雍穆清廟苾芬孝祀為酒為醴以蒸以嘗執鬯王之黃流香鬱金之美草觀濯顛若居歆孔明鬱人是供鬯人

聯事司尊彝之築鬻

右煮字周禮肆師及果鬻

贊宗伯之裸將自周

道崩離禮籍咸滅漢儀草創祀典多湮有徐生之為容

非如叔氏雖匡衡之復古未及周監其後寢微不資沿

革奉常執典同制氏之鏗鏘光祿蒞祠無大酋之湛饒

莫行其義徒紀斯文皇聖時乘官人則惠禮司皆好古

之英博士有表微之職將盡善而論德同大道之中行

豈可以沿廢為言積習而惑未辨方志不監匠人何荆

州之苞茅獨供王祭有盧家之蘭草不入國香惟昔肆

師位同祠部無為大祭之佐不若吾子之言又以籍田
明乎甲令去禮經之逾遠類俗吏之所為且甸師之給
神倉潔菜以供鬼享號文諫千畝之籍崔寔刺數畝之
耕亦曰文存不當禮廢使唐禮不備於周禮比犧牲苟
供於廩犧既慢乎粢盛仍拒我鬱鬯宜投棘署俾解星
郎

同前

祀事孔明必先於酒醴神其戾止亦在於馨香所以實

彼樽彝達其牆屋太常恪勤乃職無忝司存光祿簡慢
是彰自貽伊戚且酒人之職素著於周官酌飲之儀頗
聞於班史殷因夏禮斯損益之可知漢立秦祠固典章
而無墜本經不失前法宜遵何廢禮而速尤欲隳官而
招譴包茅不入尚責於齊侯鬱鬯廢供且虧於唐禮既
不知於金草期疑作斯自掛於玉條祠部所云奚其不當
徒稱沿廢罕顧禮經且千畝陳儀牲牢致用而三清泛
薦犧象馮施仙臺所論愚管非測禮虧顯若刑其捨諸

同前

裴幼卿

郊禘有常春秋匪懈人神足以叶祕禮物於焉致和薦
黍惟馨徵茅有典為酒為醴將見供於鬯人或廢或存
其生文於甲令至如氣交殷臭法變周因始有襲於焚
蕭竟將申於酌鬱灌以香草陳於卣罇備一獻之登歌
知百神之受職固當所習寧越禮經况乎祀典有崇太
常攸掌制經具陳斯品著令元削此條光祿不供自覺
餅之罄矣籍田為喻誰云井有人焉舊章無替於執文

王典宜新於改作三覆華省徒且慙於有司再覽太常
實未乖於彝典

同前

權寅獻

五帝殊功不相襲樂三王異俗豈同常禮是以因事立
制則制施而下從量時署官乃官修而人理苟有其闕
誰執其僣且祭天饗神太常攸主鬱夫酒正光祿是司
率彼舊章博士諸供而有裕顧瞻新職匠人久廢而何
憑夫以誠敬無文精靈不測若昭之以明德聽之以和

聲則澗谿沼沚之毛可羞宗廟潢汙行潦之水堪薦鬼神且虧季蘭之誠何必鬱金之草况國家光膺駿命克享天心合昭穆以潔精下神祇而誠感酌至玄之酒七廟孔脩奏無聲之樂六宗攸序所以鬱鬯之禮見遺而不行金草之司有文而且闕省司含香推妙起草稱工酌一人之心是言沿廢引三推之令遽比兼供籍田既不供犧牲造酒何煩供鬱鬯禮雖見著令式空存請從祠部之言無聽太常之執

同前

國家大禮畢具無文成秩聲名赫乎上古享獻周於百
神每窮谿澗之毛誰爽粢盛之備太常宗廟攸奉禘祫
爰司張君理窟之才王肅儒宗之望請供鬯酒擬實卣
罇允得事宜雅符恒典光祿以無匠不造又用靡草為
辭有司以沿革不同兼引籍田特比犧牲不廢愛禮斯
深鬱鬯莫供司存何劣且鬯人之職須預其材疑釀金
草之芳酌充蔓茅之既灌何得不供所務輒替鬯章光

祿拒之於前祠部送之於後事均齊楚得失疑而兩兼
理同臧穀亡羊而一揆况國禮明著安可闕如咸請推
窮方結刑憲

太廟登歌判

冬享太廟登歌擊拊大管不作法司科管者詞云鼓轉
不奏有所由

對

遷承斐一作
裴

蒸嘗有儀霜露是感必先金石之序以降神祇之福故

潔粢豐盛年和登也博碩肥膄人力存焉使三獻克終
九成斯辨堂上堂下咨樂正而為節載拊載擊播頌聲
而有倫大管或虧小轉一作鼓攸闕既齊楚以引過奚
韶護以合雅宜寘法司以應伏慝

造禰判

丙以飴鹽造禰或責以苦鹽有闕

對

田儀晔

虔稽祀典類造之禮攸陳緬睇齊筵俎奠之儀當潔丙

麗名宗伯展事鹽人白黑孔脩錯形飴而在列玄纁判
則一作備考齶苦而斯乖雖德之惟馨亦或罔吐而物有
奠具謂何獲釐大事闕供小懲非道

薦新判

春日薦新乙不送鹽

對

蒼龍正宿朱鳥方春山梅早花沼萍新葉嘗新傳於楚
俗先薦表於周年採蘋奠誠式遵於南澗進櫻追遠首

在於西京至若類獸之鹽唯調和於醢醢閩陽之薦恐有
隔於蒸嘗請準恒科以懲其慢

掃道判

甲主郊道當汜掃反道甲脩故而除無所改易所由科
之不伏

對

經途九軌列以城國通莊四會達彼川梁廣直如弦有
文侯之擁篲脩平若砥見伯也之執爰非據疾藜將樹

桃李無使障塞用絕艱虞歲祀不除時饗不理甲掌惟
郊道侯承司祭喪者輟哭田燭是為百神以宗方陳明
水之薦三條是務式崇新土之宜類築傳巖固將遵於
大制殊開京兆亦何更於前名苟雜榛蕪足歆蘋藻誠
為獻力匪曰犯刑且汜掃理在恭嚴反道義非變易何
必改作方設興功脩故而除足奉虔誠之節棄核而按
永通按獄之明

祀玉判

甲掌六器不依方色所由加罪訴稱玉人闕供

對

顧健

國有五禮甲主六器或欽若天地或虔奉廟祧將以降
神祇辨方色則必臨之以莊敬守之以豐潔使舊章攸
叙靡物不精甲忝曰司存宜其祇肅徒尸此職曾不是
省六宗有祀已墜虞章三禮何知載懋周典所由加罪
亦謂金銘一作金名非勿言文過飾非方推玉人有闕若懲
求有志一作至自可預論既臨時有乖欲何逃責闕供之

罪定罪非遙未知祠祀所須為復陳設所犯待知本坐
庶論如律

犧牲判

太常申稱充人養供大祀犧牲不如法致瘦損

對

精靈不測有上下之神祇敬誠無文有春秋之禴祀若
昭之以明德聽之以和聲則澗谿沼沚之毛可一脩於
宗廟蘋蘩藜藿之菜可一薦於鬼神若無肅敬之心而

有淫昏之祀則卜郊非祀國史由其致譏齋戒不嚴天
皇於是流譴充人早霑明化忝曰司存職三犧之純養
供六牲之蕃物固調其黍芻之食潔其文綉之衣豈容
不整羽毛曾無博碩致令瘦損須寘科條

文苑英華卷五百十七

欽定四庫全書

文苑英華卷五百十八

宋 李昉等 編

祭祀三

封君諸侯大夫門十九道

封君祭判三道

諸侯祭判一道

大夫祭判五道

三命判四道

家廟失祭判一道

牢祭有違判五道

封君祭判

乙祖是始封君祭以不毛所司將為失禮不伏

對

封植之規盛自三代享祭之設編諸五禮故存欲其貴
梁竦發勞人之言沒憂其祀若教興餒而之歎乙祖幸
攀日月視列山川堂構不貽於謀孫廟食遂虧於厥祖
乃云可薦孰致其嚴洪業不享其牲牲明懷誰歆其黍
稷所司重從周之訓糾以常刑愚者昧反魯之言尚多
紛訟彼不愛禮奚能捨諸須寘恒辜雅符通議

同前

禮經三百列爵五等食米地以居榮封茅土以建號代
不絕祀人其捨諸乙以孫謀瞻言祖德精意以享展如
在之儀利用建侯思一作乃不復之始詢諸家祭酌彼周
官薦羞之容無聞於肥脂不毛之事有異於粢盛且物
貴緣情猶言禮不下庶而乙非妄作何妨儉而合禮既
能師古奚事驚愚所司告言頗為漏畧大易自宜窒訟
春秋寧貸有詞

同前

張鼎

百王率由禮建方社六服咸若寄切維城列玉瑞以推
尊錫圭田以表德綬分四色爵配五等開國稱孤彼既
光於祖業列筵設奠此何昧於家聲言念庀牲空慙掩
豆雖展敬於如在果見嗤於不毛葬以大夫禮既隔於
問子爵為侯氏祭豈及於謀孫親牽之用頗乖受脤之
名應缺自須聞義能徙何不以欲從人

諸侯祭判

私廟三室將置新主家老毀檐主人訟之所由以非禮
免之

對

閻伯與

毀廟遷主告終稱嗣父昭子穆將順從時之典易檐改
塗恐墜思先之戚儀雖仍舊禮則謀新初致孝以觀德
終因心而崇敬歲聿云暮祭則有倫守宗祏之威儀率
由殷奠考新宮之成式虔奉外除所謂斯人未明古道
訟彼家老自貽不臧

大夫祭判

有五品祭寢不祭廟饌用索牛御史劾於寢則已陋於饌則已泰訴云禮令無違

對

禮有九命聞之典秩爵惟五品存乎令制以祿饗親追宗孝敬之道以賢致位周旋名器之間從事於斯無宜失墜執禮以動何所遲迴然則吾從大夫之后祭中寢而非爽奉守先王之典用太牢而為過今則無廟予欲

何之索而致牲古亦詳矣憲臣按法操持一作柄特深訴者執詞情理可據

同前

劉昇同

國政通班書崇明祀朝則齒爵載分於羔雁祭必毛牲取類於豺獺惟彼五品薦于四時邊豆聿脩履濡霜而或惕寢門是祭因掃地而致誠克恭行葦之酌或備采蘋之奠雖夫子立言且云寧儉而聖人行禮必貴從宜恭已習常情稱偏下因心達孝事則由衷屬避馬申威

出漢臺而有問索牛是劾撫周禮而猶疑饌取於豐祭
從於薄過如不及吾恐失之必存著甲之令一作命請恕
先庚之罰

同前

斐士淹

命分九等以庸制爵禮有五經莫重於祭先王所以致
理孝子為能饗親乃如之人茲率厥典故無忘於如在
道有孚於不黷黍稷惟馨邊豆有楚哀樂相半必觀饌
然之容軒裳已登非復傷哉之歎且禮或豐殺法從沿

革無廟於寢在今令而則然求牲而饌徵古訓而奚失
嗟夫御史所劾恐傷曾孫是宜

同前

張鼎

廟者曰貌死者曰歸神人異業敬則如在牲牲必備祭
而勿黷秩有五品榮加三命誠乃錫類孝能尊先春露
既濡增怵惕之感秋霜已降發悽慘之心雖欲饗親孰
為知禮祭於寢也自合割羊祀諸廟焉方聞用犢庖丁
展事雖則無全鄰人將入如何不問令無立廟理歸於

寢祭設庶人之位薦以大夫之牲索而用之非其古也
頻繁可重豈煩介葛之犧黍稷非馨寧展蒸嘗之禮精
意以饗神其吐諸禮雖徵於曲臺罪自招於石室欲加
之罪其無辭乎

同前

人生最靈魂變為物儀陳祭禮祀分物類品第有差等
威是列秩牽朱綬雖登命於大夫廟闕丹楹未為能於
孝子祭寢非約用牛是泰儉以偏下已聞晏子之節禮

而僭上更知管仲之罪蘭臺陔履雖陳膳栢署彈違竟
持霜古訓是則今令未裁且祭寢祭廟既有秩而分求牛
索牛豈無故而殺劾而是誠誠室惕而有孚訴者非辜
終獲校而無咎

三命判

乙仕登三命舉以特牲祀以少牢人告其僭加於舉禮
也

對

孝自天經禮為人紀事有動於神理迹無昧於生成乙
則大夫位登右職庶極四時之享以符三命之貴飲食
讌樂特牲備舉珪璧嚴莫少牢是加用誠信以敷心資
豐潔而致薦是實一作寶其訓何糾其違徵之於前固不
可罰

同前

顏真卿

侑食以樂執恭展禮以辨等威以明貴賤乙以筮仕策
名清朝從大夫之後既登三命循先人之祭有事十倫

已而鏗鏘具舉和平不爽苾芬承祀胡考之寧舉特且
叶於禮經加牢永虧於祀典人告其僭罔知攸伏

一作徒

同前

盧先之

易陳殷薦書列禋宗於昭考祀作樂崇德况春水風泮
河濱有獺祭之魚秋葉霜凋山林有豺祭之獸微物尚

爾

一作具

生靈

一作兩靈

伊何且國有十倫仕登三命尊卑式

序威儀孔昭車服以庸祀享寧僭矧惟舉禮無乃用心
凡舉特牲者克從其祀少牢者實符於班失或歸於訟

人禮不黷於君子為之過矣其在茲乎

同前

馬 批

聖人成能設位待仕君子脩業者行入官等威有倫名
器不假一作茶乙爵登寵命位列周行舉善有存乎禮物

敬享無虧於豐殺既感霜露不忘豺獮是以用禴於馬
展牲信以大夫之禮能行孝子之志緣祀而加誠不違
於舊典或人妄告固未適於時宜雖二簋之可享豈少
牢之為僭此其禮歟固無尤矣一作馬

家廟失祭判

為大夫家廟初成將享之夕牲死人告其違禮甲稱本
牲

對

宗廟為先是營宮室犧賦為次則備牲牲甲運偶光華

一作先舉

羽成儀飾必復其始遂見稱家利涉大川爰假有

廟一昭一穆佇列蒸嘗經之營之旋終黜堊詳夫典禮
崇彼祔儀方有聞於容聲何不務於豐潔且始養為畜

卜日曰牲未就質明之期忽斃致齋之夕萬化先往寧
俟剗剗三廟便陳實忘嚴敬用過乎儉誠不在斯事神
則難深宜捨此祭器不鬻明君子之雖貧牲斃則埋乃
先王之制禮靡尋典訓苟務所懷縱匪若教之憂終近
晏嬰之隘祭則受福義必闕如刑以正邪孽何可逭以
本牲而文過豈精意而為心實昧惟馨宜懲彼黷

牢祭有違判

孟壬具少牢祭仲已遽執畢入贊者告已有違已云以

備失也得禮之中何乃妄告俱詣博士定博士曰禮和為貴豈在爭乎科贊者不伏

對

淳宗將禮以祗祀事命滌宿宮存乎饗獻執觚奉爵理必祖於敬恭藉茅設洗事無忘於豐潔惟士榮班命數羔鴈同行擇日筮尸將行懿祀充牲視物且祭為先列羞鼎於門枋升俎載於階序巾盥在手饋核旅陳配平仲豚肩之陋思由也戶堂之禮仲已恪恭所職持畢而

來仰觀好雨之星欲理如湯之鼎此乃思無出位舉不
失宜贊者有言事同差舛博士科罰理宜當深故椒舉
規過須有媿於國僑張湯用法將無慙於虞誦請從寬
典無寘急刑

同前

張

綬

總目
作綬

我將我享維羊維牛邊豆牲牢非無升降大夫命士亦
有等威經禮孔明宗祀無替永言特牲之饋寔曰宗人
之職筮尸筮日以崇賓主之儀東序東房克明兄弟之

位况舉鼎告備雖符將禮執畢先入未或僣儀既南面以當階又尊主而備失其動也中伊糾胡為適明贊者無稽更彰博士同惡周旋既無失墜小言則亦何傷造次曾靡僣違知和豈能為貴惜其禮物博士不利於操刀正以刑書科者乃得其資斧既厚誣於君子亦淺之為丈夫將子甘心無或騰口

同前

祭者曰薦申其至誠鬼之言歸于以明德欲祠祖禰

一作

欲祀禰祖必擇牲牲苟爾儀之不脩則其咎而焉往孟壬三命是服匪懈既無忝於孝孫將有事於皇祖宿尸致祝初設位於廟中執豆陳籩終展禮於堂上相彼祀事居然可觀饒以少牢俾申於孝享用其柔日願接於神明周旋自適於等威終始不忘於齋敬執畢而入信鄒人之知禮卒事無規奚贊者之妄告徒質疑於博士合書罪於斯人

同前

李子珣

祭惟備物往籍攸先禮以貴和前賢所重苟初事之不
曠在疾徐之可容相彼孟士將有事於牲具瞻言仲已
乃無何而畢入誠則恭不失備遽而中規俎豆之事載
陳金石之音卒奏夫惟贊者忝預於斯既曰偕行還宜
共濟安得縱茲大惑發彼小瑕殊成子之不恭禍徵受
朕異陳佗之如忘疊起臨盟以懈怠之見規則聞前史
因備失而歸罪且未合宜事貴無違禮宗得中請從博
士之議庶叶隨時之理眷言贊者可無詞乎

同前

張子琳

祭禮崇孝祀事孔

一作克

明既前期筮賓亦將獻諏日於

是闕廟門以致孝所敬在供列有司而行事不舉違犯孟

王義重五經職惟三命有豐卷之位不請因以用特牲

此句疑

明周公之典據少牢而乃給然尸祝甚嚴雷

通作壘

洗具陳剛鬣柔毛則云肥腍簋簋普淖所謂馨香宰人

銜命以抽扃

見儀禮注高鉞也

仲已遽資於執畢又以舉肉在

禮寔曰無違贅者則那每事奚其不問患既自撥爭乃

增羞博士勿謂於貴和贊者終宜於伏罪

文苑英華卷五百十八